

Nafarroako autobietatik etekin handia atera zuen koronel batek

Gonzalez de Larak bi autobietako segurtasuna koordinatu zuen

Gonzalez de Lara Guardia Zibileko koronelak etekin handia atera zion Leitzarango eta Sakanako autobien segurtasunari. Koronel izateagatik zegokion soldataz gainera, hilean 435.000 pezeta jasotzen zituen bi autobien segurtasuna koordinatzeagatik.



Antonio Aragon, Herri Lanetako sailburu ohia, gaur agertuko da batzordearen aurrean.

OSKAR MONTERO

A. Unanue / Iruñea

ATZO goizean Jaramillo Foruzaingoko buru izandakoa, Tomas Dominguez Poliziako inspektorea eta Javier Gonzalez de Lara Guardia Zibileko koronela agertu ziren Sakanako autobietako adjudikazioak ikertzen dituen batzordearen aurrean. Hiruek Sakanako autobien segurtasunari buruzko azalpenak eman behar izan zituzten Nafarroako Parlamentuan.

Jaramillok, Dominguezek eta Gonzalez de Larak Irurtzun-Andoain autobietako segurtasuna koordinatzeko eratu zen batzordeko kide izan ziren. Aipatu koordinazio batzordea sortzeko erabakia Gabriel Urralburu Nafarroako Gobernuako lehendakari ohiak, Antonio Aragon Herri Lanetako sailburu izandakoa eta Jaime Sole Herri Lanetako zuzendari ohiak hartu zuten, ETaren mehatxuak jaso ondoren.

Sakanako autobia hasi zutenean, eta kasu honetan ETaren mehatxurik ez bazegoen ere, segurtasun neurri bereziak jartzea erabaki zuten.

Koordinazio batzordea bi autobietako segurtasunaz arduratu zen. Batzordeko kideen zeregina autobietako lanak zaintzeko zein segurtasun enpresa pribatu kontratatu behar ziren proposatzea zen. Azken hitza Aragon sailburuak izaten zuen. Kontratu zituzten enpresetako batek, Seguridak, pertsona bat eskatu zuen bi autobietako segurtasuna koordinatzeko, eta Gonzalez de Lara proposatu zuen. Urralbururen gobernuak onartu jo zuen proposamena. Hala, Gonzalez de Larak hilean 435.000 pezeta (17.400 libera) jasotzen zituen bi autobien segurtasuna koordinatzeagatik. Aldi berean Guardia Zibileko koronel bezala zegokiona jasotzen zuen. Garai hartan Gonzalez de Lara erreserban zegoen, eta Luis Roldan Guardia

Zibileko zuzendariaren lagun mina zen.

Lana norentzat egiten zuen galdetu ziotenean, Nafarroako Gobernuarentzat aritzen zela erantzun zuen Gonzalez de Larak. Haatik, Nafarroako Gobernuan ez zuen ez nominarik ez kontraturik ez ezer. Gobernuak Seguridari ematen zion dirua, eta Seguridak Guardia Zibileko koronelari. Gonzalez de Larak hilean 435.000 pezeta ordaintzen zizkion enpresari adjudikazioak emateko ahalmena zuen.

Gaur arratsaldean Antonio Aragon eta Jose Ignacio Lopez Borderias agertuko dira Sakanako autobien ikerketa batzordearen aurrean. Lopez Borderias Herri Lanetako sailburu izan zen UPNren aurreneko agintaldian (1991-95). Nafarroako Kontu Ganbararen arabera, Sakanako autobietako adjudikazioetan izan ziren irregulartasunek segida izan zuten UPNren agintaldian. X

Tratu txarrak salatu dituzte azken atxilotuek

Donostiako Poliziaren komisarian izan ziren

Erredakzioa / Donostia

BILLABONA eta Zaldibian (Gipuzkoa) atxilotu eta gerora libre utzi zituzten hiru gazteek tratatu txarrak jaso dituztela salatu dute, AABek jakinarazi dutenez. Aitor Oiartzabal, Iban Agirre, Asier Villaroya eta Aitor Gonzalez martxoaren 18an atxilotu zituen Polizia Nazionalak, eta Entzutegi Nazionalan deklaratu ondoren libre utzi zituen epaileak.

Komisarian gorputz guztian jo zituztela, buruan eta belarrietan bereziki, azaldu dute gazteek. Elejalderen kasua be-

hin baino gehiagotan aipatu zieten poliziek, gauza bera egingo zirela eta Elejalde beraiek torturatu zutela esanez.

Asier Villaroya birritan biluztarazi zuten, eta flexioak egitera behartu. Ziega batean sartu eta beltz batek bortxatu egingo zuela esan zioten. Bere arreba zela zioten emakume baten oihuak entzun zituen, eta elektrodok jarriko zizkieten itxurak ere egin zituzten poliziek.

Oiartzabali pistola jarri zioten buruan, eta Agirre furgoneta polizialaren atzealdean jarri zuten zutik, sorospen etxetik bueltan, batetik bestera bultzaka eta kolpeka aritzeko. X



Joseba



Gorkaren laguna

Lau euskal presok uko egin diote deklaratzeari Parisko auzian

ETArekin zerikusia izateaz akusatuta daude 14 euskal herritar eta bost bretoi

H.G. / Baiona

ATZO hasi zen Parisko Auzitegian ETArekin zerikusia izateaz akusatuak diren 14 euskal herritar eta bost bretoien aurkako auzia. Juan Carlos Estevez, Serafin Blanco, Javier Chimeno eta Kepa Pikabea euskal preso auzipetuek uko egin zioten deklaratzeari. Horrenbestez, aretoa uztea erabaki zuten.

Libre baina kontrol judizial

pean, berriz, Luxiano Aranbarri, Marian Pagaldai, Trinidad Dona Marin, Mari Luz Sebastian eta Felix Elkanok deklaratu zuten, baina euskarazko itzultzailea ukatu zitzaizenez frantsesez edo espainolez egin behar izan zuten. Auzipetuen abokatuak itzultzailea aurkeztu zuen, baina Stoller fiskalak ez zuen onartu.

Bost bretoiek ere epaileen galderei erantzun zieten. Paul Le Coq bretoiak salatu zuen aretora

sartu baino lehen erantzera behartu zutela. Gaur, berriz, Irene Stoller fiskalak akusazioa egiten du, eta ondotik abokatuen txanda izango da.

Atzoko saioan Mari Luz Bella Bringas presoak epaimahaiari adierazi zion estraditatzan badute «torturatu» egiten dutela, eta gero ez zien haien galderei erantzun. Arratsaldeko oren batean abiatuko da berriz auzia, eta arratsalderako bukatuko. X

ESKERRIK ASKO GRACIAS

Lasai egoteagatik eta ez haserretzeagatik zure ondotik kotxe bat pasatzen den bakoitzean.

Bai, bai. Garbi dago arriskua gustatzen zaizula eta beti besteen aurretik joan nahi duzula, baina ez legoke gaizki lasaiago joango bazina, zurekin gurutzatzen direnengatik eta geugatik ere bai.